

Dua kampung dilanda banjir kilat

PARIT BUNTAR - Hujan lebat luar biasa selama sejam menyebabkan lebih 15 rumah penduduk dari Kampung Permatang Tok Mahat dan Kampung Kedah di sini dilanda banjir kilat, malam kelmarin.

Penduduk Kampung Permatang Tok Mahat, Mohd Zaini Ismail, 47, berkata, rumahnya mula dimasuki air pada kira-kira jam 7 malam.

"Dalam seminggu ini, rumah saya sudah dua kali dilanda banjir kilat dan kali ini adalah antara yang paling teruk," katanya.

Hamid Abdul, 65, pula berkata, dia sekeluarga terpaksa menimba air banjir yang memasuki rumahnya.

Menurutnya, banjir kilat itu dipercayai berpunca daripada kerja-kerja pelebaran Jalan Persekutuan yang melibatkan kawasan Kampung Kedah dan Sungai Acheh.

"Sejak kerja-kerja pelebaran jalan itu dilakukan, sebahagian besar rumah penduduk di Kampung Permatang Tok Mahat dan Kampung Kedah



Mohd Zaini berdiri di hadapan rumah seorang penduduk yang ditenggelami banjir.

kerap dinaiki air setiap kali hujan lebat.

Nasib menimpa penduduk terlibat mendapat perhatian Adun Titi Serong, Abu Bakar Hussin dan Yang Dipertua Pas kawasan Parit Buntar, Abdul Bahrain Desa yang turun padang meninjau keadaan mereka semalam.

Abu Bakar berkata, pihaknya kesal isu banjir kilat itu tidak diberi perhatian sewajarnya oleh pihak bertanggungjawab meskipun sudah berlarutan sejak lebih 10 tahun lalu.

"Saya gesa pihak bertanggungjawab turun padang dan mengambil tindakan sewajarnya bagi menyelesaikan masalah ini," katanya.

Sementara itu, Yang Dipertua Majlis Daerah Kerian (MDK), Abdul Khair Ahamad berkata, pihaknya menndapati masalah banjir kilat itu berpunca daripada fenomena air laut pasang besar yang menyebabkan air dari Sungai Kerian melimpah ke kawasan Pekan Lama dan Pusat Bandar Parit Buntar.